



6. juli 2015

Inatsisartut suleriaasianni § 37 naapertorlugu Naalakkersuisunut imaattunik apeqqutissaqarpunga:

### Apeqqutit:

- 1) **Atuakkianut, eqqumiitsulianut, assilisanut il.il. pilerseqqaakkanut piginnaatitaaneq aamma pilersitseqqaartutut piginnaatitaaneq tamakkiisumik ilaannakortumilluunniit angerlaatissagaanni tamanna qanoq kinguneqassava?**
- 2) **Qanoq akeqassava allafissornikkullu suna pisariaqassava?**
- 3) **Tamakkiisumik ilaannakortumilluunniit angerlaassinissami iluaqutissat ajoqutissallu suussappat?**

(Inatsisartuni ilaasortaq, Sara Olsvig, Inuit Ataqatigiit)

### Tungavilersuut:

Atuakkianut, eqqumiitsulianut, assilisanut il.il. pilerseqqaakkanut piginnaatitaaneq aamma pilersitseqqaartutut piginnaatitaanermut tunngasut namminersornermut inatsit naapertorlugu pisanut 32-nut Kalaallit Nunaannut angerlaanneqarsinnaasunut akuupput. Suliassaqarfii pinngorartitsinerup iluanut tunngasuupput. Eqqumiitsuliornermut, nipilersornermut, atuakkianut, assilisanut, filmilianut allarpassuarnullu pinngortinneqartunut nasaanullu tunngasut Atuakkianut, eqqumiitsulianut, assilisanut il.il. pilerseqqaakkanut piginnaatitaanermut aamma pilersitseqqaartutut piginnaatitaanermut illersugaapput. Tassani ilaatigut pineqarput anersaakkut pinngortitsisutut piginnittuuneq (intellektuel ejendomsret), patent, nioqqutissat ilisarnaataat ilusilersukkamullu piginnittuuneq kiisalu tuniniaanissamut suliniutinut inatsit.

Nunat tamalaat akornanni suliaqarfearfiit arlaliusut tamakkuninnga aallussaartuupput. World Intellectual Property Organization, World Trade Organization, UNESCO aamma EU tamarmik pisamut tunngasumik isumaqatigiissuteqarlutillu konventioneqarput. Kalaallit Nunaat UNESCO-p Atuakkianut, eqqumiitsulianut, assilisanut il.il. pilerseqqaakkanut pigisanut isumaqatigiissutaanut ilanngussimavoq, Inuit Ataqatigiillu isumaat naapertorlugu Atuakkianut, eqqumiitsulianut, assilisanut il.il. pilerseqqaakkanut piginnaatitaanermut aamma pilersitseqqaartutut piginnaatitaanermut tunngasutigut aallusinerunissaq suliamut tassunga ilaavoq.

Susassaqarfii taakkua angerlaannissaanni ilisimasat pinngorartitallu Kalaallit Nunaanni nassaarineqarlutillu sananeqarsimasat annertunerusumik isertitaqaatigineqarnissaannik illersorneqarnissaannillu qulakkeerinninnissaq siunertarineqarpoq. Kulturikkut pinngorartitatta, eqqumiitsuliortut silarsuaannik, sanalukkallu isertitatigut iluaqutiginissaannut pikkorinnerulissaagut. Pikkorinnerulissaguttalu pingaartumik takornariaqarnerup annertusiartornera ilutigalugu Atuakkianut, eqqumiitsulianut, assilisanut il.il. pilerseqqaakkanut piginnaatitaanermut aamma pilersitseqqaartutut piginnaatitaanermut tunngasut samminerusariaqarpagut. Takornarissat pisiarisartagaat ullumikkut sanaartorneqartartut piginneqqaartuunik illersorneqarnerusariaqarput. Aamma nutaaliortiternerup siuarsarneqarneratigut suliffeqarfii aallarnisaasullu amerliartuinnartut Atuakkianut, eqqumiitsulianut, assilisanut il.il. pilerseqqaakkanut

piginnaatitaanermut aamma pilersitseqqartutut piginnaatitaanermut tunngasutigut  
illersorneqarsinnaaneq pisariaqartilissavaat.

Ullut suliffiusut qulit iluanni apeqqutima akineqarnissaat kissaatigaara.